

Nacrt

Na osnovu člana 13. Zakona o principima lokalne samouprave u Federaciji Bosne i Hercegovine („Službene novine FBiH“, broj 49/06 i 51/09), člana 24, stav 1, tačka 2. Statuta Općine Doboj Istok („Službene novine Općine Doboj Istok“, broj 2/25), Općinsko vijeće Općine Doboj Istok, na 18. redovnoj sjednici održanoj dana _____ 2026. godine, donosi

ODLUKU **o učešću građana u vršenju javnih poslova i** **donošenju odluka iz nadležnosti Općine Doboj Istok**

I OPĆE ODREDBE

Član 1. (Predmet Odluke)

Ovom Odlukom uređuju se način, postupak i oblici učešća građana, mjesnih zajednica, udruženja, privrednih društava, javnih ustanova i drugih zainteresovanih subjekata u vršenju javnih poslova i donošenju odluka iz nadležnosti Općine Doboj Istok.

Član 2. (Cilj Odluke)

Cilj ove Odluke je osigurati transparentan rad organa Općine, pravovremeno informisanje javnosti i aktivno učešće građana u kreiranju lokalnih politika, planova, programa i drugih općih akata.

Član (Načela)

Učešće građana zasniva se na načelima:

- zakonitosti,
- javnosti rada,
- transparentnosti,
- jednakog pristupa informacijama,
- nediskriminacije,
- odgovornosti organa lokalne samouprave i
- partnerstva sa građanima.

II OBLICI UČEŠĆA GRAĐANA

Član 4. (Oblici učešća)

Građani učestvuju u vršenju javnih poslova putem:

- javnih rasprava,
- javnih konsultacija,
- zborova građana,
- anketa,
- dostavljanja pisanih prijedloga, primjedbi i sugestija,
- elektronskih konsultacija putem službene internet stranice Općine,
- mjesnih zajednica,
- drugih oblika neposrednog učešća u skladu sa zakonom.

III AKTI ZA KOJE SE PROVODE KONSULTACIJE

Član 5. (Predmet konsultacija)

Učešće građana obavezno se osigurava prilikom pripreme i donošenja:

- Strategije razvoja Općine,
- Budžeta Općine,
- prostornih, urbanističkih i regulacionih planova,
- planova kapitalnih investicija,
- odluka kojima se uređuju prava i obaveze građana,
- drugih akata za koje Općinsko vijeće ili Općinski načelnik ocijene da su od posebnog interesa za javnost.

IV JAVNE KONSULTACIJE

Član 6. (Pokretanje konsultacija)

Nadležna općinska služba dužna je prije utvrđivanja prijedloga akta omogućiti zainteresovanoj javnosti uvid u nacrt akta i dostavljanje prijedloga, mišljenja i primjedbi.

Član 7. (Način objavljivanja)

Poziv za konsultacije objavljuje se:

- na službenoj internet stranici Općine,
- na oglasnoj ploči Općine,

- putem službenih društvenih mreža Općine, ukoliko postoje,
- putem mjesnih zajednica,
- drugim raspoloživim sredstvima informisanja.

Član 8.

(Rok za konsultacije)

Rok za dostavljanje prijedloga i primjedbi ne može biti kraći od:

- 15 dana za Budžet Općine,
- 30 dana za prostorno-plansku dokumentaciju,
- 15 dana za ostale opće akte.

V JAVNA RASPRAVA

Član 9.

(Organizovanje javne rasprave)

Javna rasprava organizuje se kada je to propisano zakonom, ovom Odlukom ili kada tako odluči Općinsko vijeće ili Općinski načelnik.

Član 10.

(Učesnici)

Javnoj raspravi mogu prisustvovati svi zainteresovani građani, predstavnici mjesnih zajednica, nevladinih organizacija, privrednih subjekata i drugih zainteresovanih lica.

Član 11.

(Zapisnik)

O toku javne rasprave vodi se zapisnik koji sadrži:

- mjesto i vrijeme održavanja,
- broj prisutnih učesnika,
- iznesene prijedloge i primjedbe,
- stav obrađivača o prijedlozima.

VI ZBOROVI GRAĐANA

Član 12.

(Zbor građana)

Zbor građana može se organizovati na području jedne ili više mjesnih zajednica radi razmatranja pitanja od zajedničkog interesa.

Član 13.
(Iniciranje zbora)

Zbor građana mogu inicirati:

- vijeće mjesne zajednice,
- Općinski načelnik,
- Općinsko vijeće,
- najmanje 30 građana sa područja mjesne zajednice.

VII ANKETE

Član 14.
(Provođenje anketa)

Radi utvrđivanja stavova građana o pitanjima od značaja za lokalnu zajednicu, nadležne općinske službe mogu provoditi ankete u pisanoj ili elektronskoj formi.

VIII OBAVEZE NADLEŽNIH ORGANA

Član 15.
(Razmatranje prijedloga)

Nadležni organ dužan je razmotriti sve blagovremeno dostavljene prijedloge, primjedbe i sugestije.

Član 16.
(Izveštaj o konsultacijama)

Uz prijedlog akta koji se dostavlja Općinskom vijeću obavezno se prilaže izvještaj o provedenim konsultacijama i javnim raspravama sa pregledom prihvaćenih i neprihvaćenih prijedloga i obrazloženjem.

IX LICA SA INVALIDITETOM

Član 17.
(Pristupačnost)

Organi Općine dužni su osigurati licima sa invaliditetom pristup informacijama i mogućnost učešća u postupcima predviđenim ovom Odlukom.

X ZAVRŠNE ODREDBE

Član 18. (Nadzor)

Za provođenje ove Odluke odgovorne su općinske službe u okviru svojih nadležnosti.

Član 19. (Prestanak važenja)

Danom stupanja na snagu ove Odluke prestaje da važi Odluka o učešću lokalnog stanovništva u vršenju javnih poslova („Službene novine Općine Doboj Istok“, broj 9/07).

Član 20. (Stupanje na snagu)

Ova Odluka stupa na snagu osmog dana od dana objavljivanja u „Službenim novinama Općine Doboj Istok“.

BOSNA I HERCEGOVINA
FEDERACIJA BOSNE I HERCEGOVINE
TUZLANSKI KANTON
OPĆINA DOBOJ ISTOK
OPĆINSKO VIJEĆE

PREDSJEDAVAJUĆI
OPĆINSKO VIJEĆE
Mašić Amir, dipl. pravnik

Broj: 02-_____/2026.
Datum: ____ 2026.godine

O B R A Z L O Ž E N J E

Nacrta Odluke o učešću lokalnog stanovništva u vršenju javnih poslova

I PRAVNI OSNOV

Pravni osnov za donošenje Odluke o učešću lokalnog stanovništva u vršenju javnih poslova sadržan je:

- u članu 13. Zakona o principima lokalne samouprave u Federaciji Bosne i Hercegovine ("Službene novine F BiH", broj: 49/06 i 51/09), propisano je da vijeće u okviru svojih nadležnosti obavlja i druge poslove utvrđene zakonom i Statutom i

- u člana 24, stav 1, tačka 2. Statuta Općine Doboj Istok („Službene novine Općine Doboj Istok“, broj 2/25, propisano je da je Općinsko vijeće nadležno da donosi odluke i druge opće akta kojima uređuje pitanja iz samoupravnog djelokruga općine, a članom 12. je propisan samoupravni djelokrug.

II RAZLOZI DONOŠENJA

Općinsko vijeće Općine Doboj Istok je ranije donijelo Odluku o učešću lokalnog stanovništva u vršenju javnih poslova („Službene novine Općine Doboj Istok“, broj: 09/07). Međutim, imajući u vidu protek vremena od njenog donošenja, izmjene zakonskih propisa koji uređuju oblast lokalne samouprave, kao i potrebu unapređenja mehanizama učešća građana u procesima odlučivanja, ukazala se potreba za donošenjem nove odluke koja će na cjelovit i savremen način urediti ovu oblast.

Predloženom odlukom regulišu se način, postupak i oblici učešća lokalnog stanovništva u vršenju javnih poslova iz nadležnosti Općine Doboj Istok, s ciljem jačanja transparentnosti rada organa lokalne samouprave, unapređenja saradnje sa građanima i povećanja njihovog učešća u donošenju odluka od lokalnog značaja.

Donošenjem ove odluke Općina Doboj Istok usklađuje svoje propise sa važećim zakonskim rješenjima i standardima dobre uprave, te stvara pretpostavke za ispunjavanje obaveza preuzetih u okviru aktivnosti reforme javne uprave.

Na osnovu gore izloženog predlažem Općinskom vijeću općine Doboj Istok da donese Odluku o učešću lokalnog stanovništva u vršenju javnih poslova u predloženom tekstu.

**PREDLAGAČ:
OPĆINSKI NAČELNIK**